



*Selasa, 06 Desember 2022*  
**Ogen: Daniel 9:20-27**



**"Mindo Alu Mengisngis"**



Mindo alu mengisngis ertina tutus ras usur-usur mindo, kerna kai siiperluken kita. di kune gia pemindon e lenga seh, la mis ngadi mindo. Mindo alu mengisngis lit i je kesabaren, kiniteruken ukur ras erpengarapen. Umpamana bagi sekalak anak si mindo man orangtua lako nukur barang si atena ngena, gelahna datsa kel barang bagi sura-surana e, alu la ia bosan-bosan tetap ipindona man orangtuana, banci pe rikut iluhna mambur. Seh idatsa sura-surana e tetap ia mindo alu la medu-medu.

Kegelhenta pe megati bagi danak-danak si lit sura-surana ndai. Mindo kita man Dibata arah pertotonta, seh kita ngamburken iluh alu pengarapen gelah ibegiken Dibata kel pemindonta. Ertoto kita man Dibata alu la erngadi-ngadi, mungkuk kita iadep-adepenNa nehken sura-suranta. Mindo kita man BaNa alu mengisngis janah sitimai alu saber kerna pemindonta seh Dibata nehken sura-suranta. I bas kita mindo e, tentu ate Dibata kita tetap nggeluh alu saber, meteruk ukur dengen erpengarapen sabapna waktuna Ia mereken pemindonta e labo bali bagi waktu si ateta jadi.

Daniel pe i bas ia mindo pengalemi dosa nandangi perbahanen si ilakoken bangsa Israel, tetap ilakokenna alu la medu-medu. "Terus aku ertoto, ngakuken dosa-dosangu ras dosa-dosa bangsangu Israel, janah mindo alu mengisngis man Tuhan Dibatangu." Daniel nuduhkan kiniterukken ukurna dengen kesetianna mindo man Tuhan arah pertoton si la erngadi-ngadi. Perbahanen mindo e ilakoken Daniel gelahna lit perubahen bas diri bangsa Israel kenca bangsa e i ukum Dibata. Pertoton siilakoken Daniel e, ijabab Dibata alu ngutus malekatNa Gabriel lako nampati ia guna ngantusi pengenehnen si idahna. Tupung ibenaken Daniel mindo alu mengisngis arah pertotonna, ialoi Dibata ia erkiteken keleng kap ate Dibata kempak Daniel. Turiken isi pusuhta, pindolah man Tuhan alu mengisngis, daramilah si bagi sura-sura Dibata.

*Pemindonta bagi sura-suraNa*